

浙江通志

浙江省圖


12

福建界


江西界

西

江南界



中华书局




浙江省圖

清雍正朝

浙江通志

12



局

敕修《浙江通志》卷二百二十六

寺 观 一

考前代五山十刹隶浙者过半，而洞霄金庭之属，久标灵迹，琳宫梵宇称极盛焉。我朝赐额捐金，屡有兴建，盖以上以祝鸿祚，下以祐民生也。第汉晋以来，千有余载，二氏之居不可殫述，谨择其最著者详于篇。志寺观。

杭州府 钱塘、仁和二县附郭

积善海会寺 咸淳《临安志》：在吴山，吴越王钱氏建，旧名石佛。宋大中祥符中，改赐今额。嘉泰间毁。《武林梵志》：元至正间重建，平章库子山书“大海会寺”额，御史大夫庆童书“观音宝殿”额。《钱塘县志》：明成化十年毁。逾年，僧浩中重建。国朝，康熙三十七年，住持皈一复募新之。寺踞吴山东南冈，号称胜地。每逢水旱，必迎上天竺寺观音大士于此祈祷，雨暘无不立应。雍正九年，总督臣李卫饬属重修。李卫《重修海会寺碑记》：吴山海会寺面对大江，后翼重峦，城中官舍庐井灿然。如在履舄下，固东南明秀区也。寺建于吴越钱氏有国时，名石佛智果院。宋代赐名积善海会寺。元至正中，独称今名，废兴者屡。每当兴复，必拓旧观而大之。前后凡三进，每进三楹，天王诸菩萨像皆具，而正殿则虔奉大士像于中。官斯土者，遇水旱告愆，必迎天竺大士于斯。积诚祈祷，呼吸可通，盖灵气所萃，实式凭焉。自宋至今，千有余年矣。予奉天子命总制是邦，再闰已逾，吏民相浹，时和年丰，间或赐雨，不若为民请命，无不立验。庚戌夏，以旱禱，故止息于寺，搜览碑碣，知寺自国朝康熙戊寅重建，后历有年所。己酉岁，知略加修补，而余制犹未备，恐久而弗治，行就倾圯，乃飭所属庀材鸠工。凡梁柱之蠹朽者，榱桷之挠损者，甍瓦阶级与墙垣门庑、阑楯之颓坏者，一新之。佛像庄严，诸天罗列；金容宝相，光耀云表。而又于殿庭之隅，建厅事三楹，以为官吏斋宿之所。阅两月而讫工，费取诸公，不

以簣土寸木征应于下，防累民也。役既竣，乃进属吏而告之曰：若知所以修建之故乎？非为奉象教，尚虚无侈，禅林之闳丽已也。盖体圣天子惠元元之至意，必欲释共疾苦，予之安乐苟有益于民者，务设诚意敬使之，阴相默佑，以纳于太平仁寿之域。故明以诚感，灵以诚应，有必然无疑者，是海会寺之崇大士，与寒暑时日、星云水旱之祭有礼殊而诚合者矣。今年春，天子诏修天竺大士之宫，而予于奉行后复新。海会寺盖精庐，虽异灵照则同，既为圣天子之所垂注，亿兆人之所瞻仰，不尤当敬，谨增饰以为揭虔妥灵地耶！至历朝兴废之祥，见于明翰林修撰李公旻、按察副使赵公宽，暨国朝少司寇陈公论碑文，与载诸郡邑志乘者可考而知。而余飭属修建之费，凡木石砖甃、髹漆之属，与役夫之工，具有籍在，故略而不书。时雍正辛亥十一月穀旦。十三年，御书“宝月清光”四字额，赐悬正殿。

定水寺 《西湖游览志》：宋乾道八年，建于万松岭。嘉定八年，移清波门外。元至元十三年筑城，徙建七宝山。

云居圣水寺 《钱塘县志》：在云居山。《西湖游览志》：云居庵者，宋元祐间僧了元建。圣水寺者，元元贞间僧明本建。明洪武二十四年，并圣水于云居，赐额曰云居圣水寺。《太平清话》：云居寺有中峰，竹炉麻鞋，鞋长尺四、五许及半身相。成化间，僧文绅修。张翥《秋日游圣水寺诗》：高处见沧溟，西风吹酒醒。潮来一片白，山拥万重青。草木如浮动，烟尘忽杳冥。登临不可极，吟思满秋汀。国朝，康熙五十三年，僧维新及其徒西铭重修。

百法寺 《明一统志》：在吴山下。《武林梵志》：宋建炎初，僧宝宁建。有大佛半身依山，凿石为之。淳熙十四年，赐额广润。元时，改额百法，赵子昂书。元末毁，明天顺元年，僧道冲重建。

开宝仁王寺 咸淳《临安志》：在七宝山。宋僧慧照绍兴五年奏建。绍熙二年，始赐敕额。嘉泰甲子、绍定辛卯一再毁，僧祖仁重建。景定五年又毁，寻复建。周文璞《归憩仁王寺诗》：重到招提未觉迟，钵单初副袷衣时。僧房斋院门门闭，杏子枇杷树树垂。蚁荫经幡求托化，龙缠佛座学慈悲。长年无事闲来此，坐对空山赋小诗。

敕赐永寿寺 在东园，旧名永寿庵，为南海普济寺下院。国

朝,康熙四十三年,圣祖仁皇帝赐额永寿寺。

仙林慈恩普济教寺 《武林梵志》:在安国坊。今义同坊仙林桥西。宋绍兴三十二年,洪济大师智卿建。嘉靖《仁和县志》:随筑戒坛,具奏请额,敕赐仙林。孝宗践阼,扁赐隆兴万善戒坛。理宗改今额。淳祐三年,赐“飞天法轮宝藏”额,并御书钟铭。元至正癸未延燎,复建。王祹《仙林寺戒坛记》:杭州仙林大慈恩普济教寺,有万善戒坛,普为四众传授,三聚净戒之所也。至正三年,寺厄于火,坛亦就毁。就公来领寺事,以兴废起坠为己任之。始克哀众施,建大佛殿。继又建三门、两庑,及选佛选僧二堂。惟戒坛未及兴建,为费最鉅。郡人顾君天祐父子者,尝与就公论道而有契焉,慨然乐为之造,乃损金谷,购木石,卜吉而庀工。始于十一年正月日,至明年十月而讫工。窃惟就公务隆祖道,载扬宗风,圆机应人,能无留碍。而顾君宿植德本,雅慕真乘,于世有为,一无吝惜。宜乎兹坛之建,以坏为成,有所不难也。张氏以寺为军器局。明洪武四年重建,立僧纲司。《仁和县志》:天启间毁,颖生宣法师及里人王兆京等捐资募建。国朝,雍正十一年,重修大殿、天王殿。

天长净心寺 成化《杭州府志》:在仁和北壁后洋街。今竹竿巷。咸淳《临安志》:晋天福四年,钱氏建。旧名天长。宋大中祥符元年,改赐今额。《武林梵志》:南渡后,析其地为军寨。咸淳元年兴复。元季毁,明景泰间重建。国朝,顺治癸巳,顾大观等重修大雄宝殿。庚子,陈尔琳、姚元瑛建弥陀殿、白衣观音殿。康熙五年,兵备道熊光裕建赐予观音天医真君殿。

大中祥符律寺 嘉靖《仁和县志》:在祥符桥。《祥符寺纪略》:梁大同二年,鲍侃舍宅名发心院。唐贞观中,易名众善。神龙元年,改中兴。三年,复改龙兴。《武林梵志》:宋南渡初,斥为军器所。元初,仍建寺,至正末毁。明洪武间重建。苏轼《祥符寺上元观灯诗》:纱笼擎烛迎门入,银叶烧香见客邀。金鼎转丹光吐夜,玉珠穿蚁闹连朝。波翻焰里元相激,鱼舞汤中不畏焦。明日酒醒空想像,清吟半逐梦魂飘。国朝,康熙间,里人于国梁捐资,同僧得中复建。

潮鸣寺 《两湖麈谈》:在郡城东北。寺三面皆水,水之外皆菜

畦，而寺独踞其中。成化《杭州府志》：梁贞明元年，钱氏建，名归德院。宋高宗南渡，驾幸寺，夜闻潮声，遂赐额潮鸣，有御书诗刻石，立于寺东庑。宋高宗《御书诗》：野寺参差落涨痕，疏林欹倒旧霜根。扁舟一棹向何处，家在江南黄叶村。兵燹后重建。明洪武二十四年，立为丛林。

谨按：此诗载《东坡集》中，旧志作高宗御制者误。

广寿慧云禅寺 咸淳《临安志》：在艮山门内白洋池。宋张循王之孙鎡舍宅为寺。绍熙元年，赐今额。成化《杭州府志》：俗呼为张家寺，有留云亭、白莲池。《武林梵志》：元至正间毁。明洪武十七年，僧文副重建。永乐九年永忠、宣德间广睿、弘治元年福海，相继重建。

白莲寺 《仁和县志》：在平安坊仙林桥。《武林梵志》：石晋开运元年，吴越王建，名华藏院。宋治平间，改妙惠院。咸淳《临安志》：白莲慈云院嘉泰中重建。咸淳间，僧祖显诵经持戒地产白莲，因赐“白莲妙惠寺”额。陆游《慈云院东窗小憩诗》：横阁院东偏，悠然拂榻眠。香浓烟穗直，茶嫩乳花圆。岩倚团团桂，筒分细细泉。凭谁为题版，榜作小壶天。国朝，康熙十四年毁，僧瑞光、朗超相继募建大殿，未就。僧逸林于五十年间重构落成。

长明寺 万历《杭州府志》：在章家桥东。宋开宝初，钱忠懿王建，名法灯。治平初，改今额。元庚子年毁，明洪武十八年重建。《武林梵志》：弘治十五年，僧如坝重建。万历庚戌，葺治一新。

兴福寺 成化《杭州府志》：在仁和县同德坊（今羲同坊斜桥）。宋绍兴初，左丞薛昂以花药圃施僧筑庵，曰择胜，续创寺宇，请龙山已废兴福院额，今为丛林。《仁和县志》：寺内大雄殿，名无尘殿。明末天王殿延燹，无尘独存。国朝，顺治间，僧玉涵重建天王殿。

七宝寺 咸淳《临安志》：在盐桥东。梁贞明七年，钱氏建，旧名上方多福。宋大中祥符初，改赐今额。寺有六游堂、临辉阁。

灵芝崇福律寺 《武林梵志》：在东花园崇新巷，俗称蜡烛庵。

唐贞观己酉年，郡人施光庆舍宅建，名实际院。宋佛印禅师重兴。元季毁。元统间，僧妙通重建。明洪武二十四年，立为丛林。万历壬寅，僧如尧重修。刘基《宿蜡烛庵俊上人房诗》：城外春江动客愁，江边细草绿悠悠。还将短发临岐路，畏向东风忆旧游。斜日远天归雁急，薄云孤馆落花稠。青灯不放还家梦，一夜肠回一万周。

慧林寺 《杭州府志》：在蒲场巷。宋绍兴初，汴僧惠林禅师随驾来杭，建兴国院。后改今名。元至正间毁。明洪武初重建。国朝，康熙间，僧然亮重修。

报国院 《仁和县志》：在东里坊庆春门内。咸淳《临安志》：旧为香林廨院。宋绍定间，移请今额。淳祐五年重建。《杭州府志》：明天启初毁，国朝，顺治间重新。石雨禅师说戒于此。

莲居庵 《武林梵志》：在土桥东古延寿庵址。毁于兵。明万历六年，里人虞淳熙建忏室而加拓之。吴从先改额为莲居。

佛惠寺 成化《杭州府志》：俗呼寿火星庵，在仁和县羲和坊。元大德间建，名佛惠。后毁，明景泰间重建。

悟空寺 《武林梵志》：在淳祐桥东。晋天福七年，僧齐教建，名崇新院。宋大中祥符改额。淳祐六年，法昌重修。元末毁。明永乐元年，德兼重建。

相国寺 万历《钱塘县志》：在淳祐桥东北。《武林梵志》：南齐建。唐时毁为郑景宅园。唐景云初，僧慧购为寺。值睿宗由相王即位，赐名相国。元末毁。明洪武初，僧大云重建，置僧纲司于内。正德八年，僧东明重修。

觉苑寺 嘉靖《仁和县志》：在丰乐桥东。宋尝徙三圣庙于此，改赐额，曰旌忠庙。《武林梵志》：寺久废，明宣德中重建。

崇宁万寿教寺 《明一统志》：在府城南二里。《武林梵志》：俗呼姚园寺，在高阳间巷。宋初为姚氏花园。绍兴初，僧慈昌购园结庵。乾道初，赐额。淳祐二年，建膺福殿以奉理宗御容。元季毁。明洪武初，僧大云重建。国朝，雍正十二年重修。

慈云寺 《慈云寺志》：在羊市巷东花园侧。唐相国李长源兴元元年开井建寺，题名甘露。周显德二年，僧圆觉建，名慈济。宋大中祥符二年，公主清裕修光明忏，感白鸚翔云异瑞。真宗赐额慈云。《武林梵志》：明洪武二十四年，立为丛林，沙门延礼重修。嘉靖二十年毁，僧圆鼎重建。吴用先《游慈云寺诗》：水绿山青列上方，苔深竹暗野花香。赤松亭下消余暑，惟有甘泉彻骨凉。四围秋色霭慈门，百雉城头绕白云。莫说萧然无法侣，幽禽危石共为群。

金刚广福教寺 《钱塘县志》：在板儿巷。《武林梵志》：后唐天成间，善果法师肩负金刚憩息于此，夜放光明，陈少师感异，舍地为寺。初名功德院。宋宝祐间，理宗赐今额。元至正末毁，明洪武十八年重建。万历辛亥，僧常秀重修。

慈光寺 《武林梵志》：俗称铁佛寺，在钱塘芝松坊佑圣桥西。晋开运初，晤恩禅师建。宋宝庆三年，名张府功德庵。元至正毁，明正统间重建。万历壬子，撤圯殿新之。吴用先《重建慈光寺碑记》：武林慈光寺有弥勒尊佛以铁铸之，俗称铁佛寺。晋天福间，晤恩禅师卓锡于此。开运初，御书“慈光普照”四字颜其门，法席之盛甲于通都。宋宝庆三年，清河郡王张魏公复舍基，拓而充之。元至正毁，明正统立中成师重建。寺有合抱银杏五株，及放光古井，皆宋物。井甚甘冽，大旱不涸，咸称为“慈光甘露泉”云。殿后渐圯，寺僧慧碑矢志鼎新。万历甲辰鳩工，壬子落成。其间助成者，僧智能、护法，宰官则中丞金学曾、太守凌登名、孝廉吴之鲸等；赞襄则王介、朱佐、沈坤、戴伦、张永年；而与会者俞普才者，助义田，供常住，为大殿四时香灯之费。噫！一念坚持，众缘俱到。信非诬矣！因书殿额，为标而锡之以记。

真教寺 万历《钱塘县志》：在西文锦坊南。《杭州府志》：元延祐间，回回阿老丁所建。内有明永乐敕谕碑。景泰中复葺。国朝，顺治三年，总兵苏见乐、衢州府知府韩养淳重修。

慧安寺 《杭州府志》：在十三湾巷。吴越王建于草桥门外。明洪武初，移于保安坊东。永乐间，又移今所。

开元寺 嘉靖《浙江通志》：在府治南清平山麓。《武林梵志》：

唐玄宗时建，宋建炎间徙建于西湖。元季兵燹，复徙故址。徐凝《开元寺牡丹诗》：此花南土知难种，惭愧僧闲用意栽。海燕解怜频睨睨，胡蜂未识更徘徊。虚生芍药徒劳妒，羞杀玫瑰不敢开。惟有素苞红萼在，含芳只待舍人来。

宝奎寺 《两湖麈谈》：在吴山下。宋丞相乔行简故第。万历《钱塘县志》：内有宝月楼、见沧岩。洪钟《宝奎寺记》：钱塘七宝山，在吴山之右。宋理宗朝丞相乔行简宅于山麓宝庆。丙寅，驾幸其地，登山东顾江海溟渤，御书“见沧”二字以纪胜，并刻崖石，迄今见存。行简罢相，舍宅为寺。寺获宸翰，因题曰宝奎。《武林梵志》：元季毁，明弘治间重建。成化时，寺迹瓜分，僧道泽重建。国朝，雍正七年，因大殿久圯，里人汪兆璿、潘兆新同僧志仁募建。

宗阳宫 成化《杭州府志》：在新宫桥东。《宗阳宫志》：即宋高宗之德寿宫也。淳熙中，更名重华。咸淳间，改为道院，赐今额。万历《杭州府志》：元初毁于兵。延祐间，杜南谷真人重建。至正末毁，明宣德间重建。《宗阳宫志》：宫内有飞来峰、登瀛桥、太液泉、玉兰居、子昂碑，及宋赐青铜古钟、白玉笙、铁笛、水晶扇、辟尘炉等物。古迹有通明殿、玉籁阁、蕊筒楼、道德讲堂、长生殿、老君台、卧云楼、得月轩、壶隐、橘隐诸胜。《杭州府志》：成化间，道士沈复纯重建。杨载《老君台玩月分韵诗》：老君台上凉如水，坐看冰轮转二更。大地山河微有影，九天风露寂无声。蛟龙并出承金榜，鸾凤双飞载玉笙。不信弱流三万里，此身今夕到蓬瀛。张昱《和杨仲弘诗》：当时诸老宗阳会，月与浮云几度更。丁令岂知为鹤事，道人犹作卖花声。天溥露色开蟾镜，秋送商音入凤笙。谁道紫薇垣内客，今宵又复到蓬瀛。国朝，康熙间毁，住持徐尚麟复创。雍正八年，总督臣李卫倡率募修。李卫《募修宗阳宫引》：宗阳宫者，宋之德寿宫也，在杭城东南隅，距吴山不数百武。昔光尧致政退居于此，亭台花木之胜拟于禁内。咸淳间，舍为道院，易以今名。元明两朝，废兴不一，渐以余地割为官署，占为民居。故址所存，不及十之二三。国朝，康熙丙午冬，不戒于火，荡为烬墟。道士虽尝募建，而零星草创，仍为甌脱之场，去殿宇寻丈间且久假不归矣。余于丙午春来莅兹土，及今三年间，两浙之民幸沐圣天子湛恩，汪濊俯视，闾阎蒸

然丕变。虽不敢谓政通人和，而凡厥废坠亦次第渐举矣。兹道士曹兹仁谋所以新其宫者，以牒来告，并请一言为引。余惟古无祠宇宫观，自沅湘之间，群祀河伯，继而雍之祀陈宝齐、鲁之祀城阳景王、江左之祀蒋侯，后遂靡然行之而不知止。他如《洛阳伽蓝记》所载佛寺，不可悉数，皆极一时土木之盛。至大江以南，金碧辉映，与山川竞为壮丽。说者谓皆无益于民，徒侈金钱之费，非政所宜。亟其论虽近理，然治民、事神，二者相维，务民义而远鬼神，固未尝谓无鬼神也，况愚民素来崇信，尚知有祸福感应之说，生其迁善改恶之心，风俗转移，未必不在此。则所以安百神者，宁非所以安兆民耶？况处会城之中，车马辐辏之地，使古迹沦亡而草莱在日，抚斯土者能无动心耶？抑余闻之无平不陂，无往不复，今是宫以丙午毁，而余适以丙午来通，复之道或在于此。则筑之度之，诚不可缓也。或谓用不敷，奈何？余思人之财力，当其充积繁多，无以制之，则必盈而溢，溢则消于水火，耗于讼狱不至，于匱诟不止。夫苟至于匱诟也，无宁施而舍之，量其力所能耗稍变通焉。此非惑于鬼神之说，亦所以赞乘除之化于无穷也。凡百君子或有同心，余将拭目以观厥成可乎？

开元宫 咸淳《临安志》：在泰和坊内宋宁宗潜邸。嘉靖《仁和县志》：嘉泰元年，诏改为开元宫，在秘书省，元为中书省。至元二十八年，省与宫并毁，因兼宫地作省。时董得时主宫事，购故宋理宗端孝公主第，为宫正清湖桥西。虞集《开元宫碑》：杭故有开元宫。唐开元中，刺史陆彦恭用诏书所作。乾符戊戌毁于火。后五十九年，吴越文穆王复其旧，其臣林鼎记之。宋景德丁未，敕改景德观。后十六年，有以私财修之者，进士陈賾记之。然俱不复存。嘉泰甲子，宁宗以其潜邸为今宫，复赐名开元宫，在秘书省之左。绍定辛卯复毁于火，又重作之，广以大宗正司故基，赐田七十九顷，度道士十四人以居。至元十三年，行中书省杭州即故秘书省为署。二十八年，火省及宫，俱毁。省故隘庳不足称大藩之容观，取开元地拓之，出金助开元主者董君得时及令真人购故宋公主第以为宫。公主理宗女。有司护作，唯恐故規制工伎甲于当时。至是，易其檐楹、门陛、榜署，因加表饰，设额位被服，以象其天神帝仙人之属，隆隆然，湛湛然，真神宫殊庭矣。至治初，民火延燎，住持王延寿改作之，内有清风堂、介春堂。明成化初，割遗址之半为三学射圃，重建宫于其后。黄潜《开元宫诗》：谁使藏舟一夕移，红楼翠幕未全非。曾闻帝子乘鸾去，疑有仙人化鹤归。烟迳

月明瑶草歇，石坛露冷碧桃稀。赤阑桥畔多时立，闲看杨花作雪飞。

佑圣观 成化《杭州府志》：在钱塘兴礼坊内，宋孝宗为普安郡王时外第也。淳熙三年，诏改为道宫。绍定间重建，赐额曰佑圣。孝宗尝题杜甫诗句于壁云：富贵必从勤苦得，男儿须读五车书。理宗又书全篇于东宫厅之屏。元大德七年毁，是年重建，改为观。元季兵火，此观独存。《西湖游览志》：内有洗竹亭、七叶坡、礼经筵、梦云楼、清暑檐、种药畦、馭鹤台、吹笙石、冬青迳、洗药井。井上八棱石栏，盖开元宫浴鹄池故物也。上刻虞伯生《天一泉铭》。万历《钱塘县志》：观内有宋理宗像，赵孟頫书碑。国朝初年，凡遇庆贺节，皆于此习仪上供。万寿龙牌傍设两庑，前有天王殿、丹墀，东西建钟、鼓二楼，外置棂星门，西有九皇、四将、三清、雷祖、天师等殿，后有玉皇阁。顺治十二年，设置火药局。不戒于火，其三清、四将等殿皆毁。康熙五十二年，钦颁道藏供奉殿内。雍正七年，移供圣因寺。

三茅宁寿观 《西湖游览志》：在七宝山，本三茅堂。宋绍兴二十年，因东京旧名，赐额曰宁寿观，并畀古器。咸淳《临安志》：其一宋鼎，宋武帝孝建元年八月作。其二唐钟，本唐澄清观旧物。其三褚遂良小楷阴符经。毁于元至元辛巳，明洪武初重建。成化十年，建吴天宝阁。商辂《宁寿观记》：吴山左临大江，右瞰西湖，蜿蜒盘礴，为一郡胜。概有三茅宁寿观，直七宝峰之巅，殿宇深邃，实历代祝釐之所。太监李义奉敕镇浙公务之余，间此登览，因睹寥阳殿左隙地，宜增饰轮奂，遂捐己资，市材僦工，鼎建吴天宝阁。上奉元穹圣像，下列祐圣真君像，皆备极庄严，以至钟鼓、香花，凡供神之物，靡不悉具。若乃雉堞，前环层峦，后拱波涛，浩渺潮汐，吞吐至此。使人神情开畅，尘虑消释，此阁之形胜，即观之形胜。览者当自有得，予不备书。《钱塘县志》：嘉靖间，赐道藏，改称吴山佑圣观。戊午，总督胡宗宪改三清殿为元武正殿。万历三十六年，赐道藏经一部。萨都剌《三茅观诗》：杨子江头春水涨，三茅观里碧桃开。道人不问天南北，夜半月高骑鹤来。王冕《三茅观诗》：层峦开迳隐空青，勃冕槃跚眼力生。萝磴晓风留宿雨，石林寒竹动秋声。城隍下瞰红尘海，楼阁高标白玉京。夜静何人吹凤管，碧桃千树月华明。田艺蘅《游三茅观访郑炼师诗》：小隐居城市，悠然寄一

邱。青山同入定，黄叶自惊秋。湖影摇晴榻，钟声度暝楼。丹砂何日就，期尔在元洲。

通玄观 万历《钱塘志》：在馨如坊，宋绍兴间建。《蜕庵集注》：内侍刘敖修真结庵于此，高宗御书“通玄”二字榜之。《西湖游览志》：明嘉靖间，法师徐道彰重修。度元良《重修通玄观碑记》：瑞石山通玄观，宋绍兴壬午，都录少师鹿泉真人刘敖之所建也。敖高宗内侍，志慕元元乞为道士。高宗赐名能真荣之爵号，俾主宁寿观。真人尝梦三茅君乘鹤至瑞峰之阳，旦而见三鹤飞翔梦所，良久乃去。明年是日，鹤至如初，真人感之，请于高宗，爰建殿以祠三茅。又立三清殿于山巅，后列谒斗台、望鹤亭，及道流栖炼之室，高宗命曰通玄，书额赐之，是为观之始也。元道士俞行简重修，有贯云石、虞伯生、张仲举诸公赠诗存焉。元末兵火，殿宇为墟，古像不毁，人异之。皇明成化庚寅，道士徐渊澄与其徒徐道彰，即旧址兴建，尽出己资，人亦乐相焉。琳宇崇丽，玉像精严，碧瓦鳞次，瑶阶肪截，盘磴曲栏，嘉木秀合于是，通玄之胜殆不知在阊阖中矣。道彰之孙郁存、方善继先志。嘉靖庚寅，观复灾，惟三清殿力救仅免，复加修治，坚完辉润，曲尽心力，倚山为宫，岚濛蒸溢，惧其易坏也。槛柱阶阼，悉用贞石，坊瓮孔固，石崖莹密，特异他山。旧刻宋高宗诗、三茅君鹿泉像，及诸名人题志。又增刻元一像而修饰之，位置有法，皆存方规画也。虞集《通玄观赠俞行简法师诗》：仙坛遥接上真宫，吴越江山一望中。南北两峰云杳霭，东西三浙雨溟濛。经声旋动仙音作，楼阁萦回复道通。云鹤仙人无定迹，飏轮时辗望三峰。贯云石《通玄观诗》：遁迹复忘形，丹成养性灵。精诚动神鬼，呵叱走雷霆。鹤去松云满，龙归雨气腥。送师歌短曲，凉吹袭江亭。

玄妙观 《西湖游览志》：在石龟巷。咸淳《临安志》：唐时为紫极宫。梁开平二年，改真圣观。宋天禧三年，郡守王钦若奏徙天庆观额于此。绍定四年毁，有旨重建，御书“天庆之观”四大字以赐。《钱塘县志》：元改今额，后毁，明正统间重建。

宝极观 嘉靖《仁和县志》：在观桥西北。元延祐五年，道士张无为建。《仁和县志》：旧名玄元庵。明永乐间，真人周思得扈驾北征有功。既没，其徒请大其庵制。可，因赐今额。中有张三丰遗像。

洞真观 《仁和县志》：在夹道巷，宋绍兴间建。元至顺辛未，道士顾石庵修葺。明初，王守中开拓殿庑。成化丙戌毁，住持何志远相继修葺，焕然改观。

显真道院 成化《杭州府志》：在东里坊庆春门里。宋建炎三年，王庆舍地建。元季毁，明洪武间重建，正统间增葺。国朝，雍正八年，住持金三允重修。

紫阳庵 《西湖游览志》：在瑞石山。宋嘉定间，邑人胡杰居此，建集庆堂。元至元间，道士徐洞阳得之，改为紫阳庵。《两浙名贤外录》：钱塘瑞石山，道士徐弘道常感张平叔住山传诀，故庵名紫阳。万历《钱塘县志》：元丁野鹤坐化于此，遗蜕尚存。《钱塘县志》：明方伯史继宸、范涑重修。国朝，雍正十二年，总督臣程元章奉敕重修。

重阳庵 《重阳庵志》：在吴山之右。唐开成间，道士韩道古结茅以居。相传行至洞口，见青衣童子，问之不应。良久，入洞逐之不见，闻风雨声，毛发悚栗而出。元大德间，西川道士冉无为云游至浙，因观青衣岩洞，遂盖三清宝阁、元帝圣殿。明洪武二十四年，立为全真丛林。丙子，道士钟道铭募缘重建。成化十一年，住持梅道暹撤旧新之。张雨《游重阳庵诗》：仙家亦自有仙山，几度来游问大还。松掩洞门人不到，数声清磬落人间。峭壁层崖紫翠深，松萝垂洞昼阴阴。青衣本自蓬莱客，天上人间何处寻。

钱塘县 城外寺观

圣因寺 在西湖孤山之阳。康熙四十二年，圣祖仁皇帝省方南巡，两浙官民欣忭爱戴，恭建行宫，以为驻蹕之地。雍正五年，巡抚臣李卫奏称行宫闲设湖滨，无以展臣子诚敬之思，请改为佛寺，朝夕焚香，顶礼祝颂圣德神功于万世，奉旨准行，钦定寺名。御书“圣因寺”额，又御题“泽永湖山”四字。谨于寺中万岁楼崇奉圣祖仁皇帝神御龙牌，俾万世臣民恭敬瞻仰。雍正十一年，特命悟修禅师明慧来主方丈，焚修徒侣常数百众，官给膳田，以供斋钵。十二

年，御书“慈云徧覆”额，奉悬大殿。

昭庆律寺 《西湖游览志》：晋天福间吴越王建。宋乾德二年重修。太平兴国三年，建戒坛于寺中。《客越志》：昭庆寺旧为浙西丛林第一，设戒坛，每岁上巳，推高腊者一人，登座说法。云水携锡，来受戒者，无虑千万。南渡后，以其地为策选锋军教场，寻复为寺。元末毁，明洪武初重建。成化间毁，云水僧广慎复营之。《钱塘县志》：嘉靖间毁于海寇，都御史胡宗宪重建。隆庆间复毁，新都汪道昆募建。万历三十五年，敕赐银一千两助建，崇祯庚辰复毁。陈尧佐《昭庆寺诗》：湖边山影里，静境与僧分。一榻坐临水，片心闲对云。树寒时落叶，鸥散忽成群。莫问红尘事，林间肯暂闻。国朝，顺治间重建。康熙四十年毁，五十二年，将军诺罗布重建。

保叔寺 《武林梵志》：古名崇寿院，一名圣寿禅寺。在宝石山上。宋开宝中，吴越相吴延爽建，内有九级浮屠，名应天塔，又呼保叔塔。《武林旧事》：咸平中，僧永保修，故名。《西湖游览志》：明弘治间，雷震塔，渐圯。正德九年，僧文鏞重建，又建西方殿于塔后。嘉靖元年，塔毁。二十三年，僧永果重建。

大佛寺 《客越志》：在宝石山麓。《湖堦杂记》：石佛半身，相传为秦始皇缆船石。《武林梵志》：宋宣和中，僧思净者当儿时，见之作念，曰：“异日出家，当镌此石为佛。”及长为僧妙行寺，遂镌石为像，饰以黄金，构殿覆之，遂名为大石佛院。元至正间，院毁，佛像亦剥落。明永乐间，僧志琳重建，敕赐为大佛禅寺。弘治四年，僧永安重修。寺畔有塔，俗称壶瓶塔。李攀龙《大佛寺诗》：西湖斜日净风烟，北岭岿然出半天。磴道乍从云外转，楼台已入镜中悬。塔分西域铜瓶势，石记秦皇锦缆年。白社但须彭泽酒，青山不用华家泉。波摇玉树堪双映，月上珠林好独眠。我辈自狂君莫讶，平生未敢谬周旋。

玛瑙寺 《杭州府志》：在葛岭东，一名宝胜寺。咸淳《临安志》：石晋开运三年，钱氏建。治平二年，赐额。《西湖游览志》：宋大中祥符间，僧智圆重修。淳祐八年，安抚赵与簋重修。元末毁，

明永乐间重建。张雨《宿玛瑙寺诗》：一宿葛洪丹井上，化为蝴蝶梦魂清。湖田凉蚱四散吠，烟寺晓钟相递鸣。孤屿横生为玉几，初阳灿烂似霞城。拏舟又向水云去，听我风篁雪窦声。

智果寺 成化《杭州府志》：在葛岭上。咸淳《临安志》：石晋开运元年，钱氏建。宋元祐中，郡守苏轼重建。法堂有题梁，有参寥泉。《西湖游览志》：旧在孤山。宋绍兴间徙建北山。有泉适出，好事者仍名参寥泉，以志旧迹。元末毁，明洪武初僧可祥、慧炬重建，其梁自孤山移置。

招贤律寺 咸淳《临安志》：在葛岭下。唐德宗朝，郡人吴元卿为六宫使，弃官参鸟窠禅师建庵。石晋开运三年，钱氏建院，名招贤院。宋治平二年，改禅宗院。宝祐三年，重建法堂。成化《杭州府志》：元末毁，古殿独存。国朝，康熙十五年，僧起纲重建，名清隐庵。

风林寺 《钱塘县志》：在葛岭西，俗称喜鹊寺。《西溪梵隐志》：唐鸟窠禅师道场。《武林梵志》：明宣德间，僧如月重建，敕改今名。

护国仁王寺 咸淳《临安志》：初，慧开禅师休粮禅定于隆兴黄龙峰，所至祷雨辄应。孟珙为捐金买地建寺。宋淳祐五年，赐今额。《西湖游览志》：元至正末毁。明洪武初，僧祖吉重建。《钱塘县志》：嘉靖间，僧明贵重修。

敕赐清涟寺 《十国春秋》：石晋天福三年，吴越王瓘建。咸淳《临安志》：旧名净空院，宋理宗赐御书“玉泉净空之院”六字。《钱塘县志》：内有细雨泉、观音殿。《名胜志》：玉泉方池，亩许，清澈可鉴，畜五色鱼数十头，游泳如画。寺内有翠微阁、眠云堂、洗钵池诸胜。岁久寺圯。明万历年间，邑令聂心汤复之，为署“晴空细雨”额。王世贞《玉泉寺诗》：寺古碑残不记年，清池媚景且流连。金鳞惯爱初斜日，玉乳长涵太古天。投饵聚时霞作片，避人深处月初弦。还将吾乐同鱼乐，三复庄生濠上篇。国朝，康熙三十八年，圣祖仁皇帝南巡，驾幸寺中，赐名清涟寺，御

书寺额，赐金刚经一部、大士像一尊。

法相寺 万历《杭州府志》：即法相院，在南山。咸淳《临安志》：石晋天福四年，吴越王建。旧名长耳寺。宋大中祥符九年，改今额。《钱塘县志》：明万历三十五年，邑令聂心汤修。樊良枢《人日游法相寺诗》：空山清寂迥藏春，杖底风烟傍客身。济胜百年谁是主，登高此日又逢人。华龕云荫松溪冷，日窠泉香竹阁新。且欲从君归白社，何妨载酒往来频。徐尔铨《访法相西上，人有作见示，次韵酬赠诗》：卜筑孤凭夕壁间，静中诗想几曾删。台前归鸟如相识，窗外浮云即等闲。一径野花常到眼，十年清梦不离山。我来共对飞泉下，日落松鸣去复还。

虎跑禅寺 《虎跑寺志》：在西湖南山。唐元和十四年，寰中禅师结庵于此，感二虎跑山，泉源涌沸，故称虎跑。宪宗赐额广福院。宣宗大中八年，改额大慈禅寺。僖宗乾符间，敕加“定慧”二字。宋宝祐初，僧至惠结屋以居，宋末兵毁。咸淳《临安志》：祖塔法云院，旧名资庆。大中八年，改名大慈。开运二年，改仁寿。太平兴国六年，改赐今额。王十朋《苏诗注》：祖塔院，今虎跑是也。元初，僧克符重建，结草庵于故址。元季，僧实山一新栋宇。明洪武二十四年，立为丛林，名虎跑禅寺。《钱塘县志》：嘉靖十九年毁。二十四年，僧永果重建。苏轼《病中游祖塔院诗》：紫李黄瓜村路香，乌纱白葛道衣凉。闭门野寺松阴转，欹枕风轩客梦长。因病得闲殊不恶，安心是药更无方。道人不惜阶前水，借与钁尊自在尝。晁大年《虎跑寺和东坡诗》：於菟跑地泉水香，醍醐入口甘露凉。龙吞沧海军持满，僧入翠微山路长。乾坤万古有清气，钟鼓数声闻下方。剡泉煮茗作清供，峨眉老仙曾共尝。孙一元《同凌时东吴介夫僧古心游虎跑寺泉诗》：长日寻幽处，穿林兴不穷。把杯秋寺里，得句野泉中。山路晴吹叶，石梁晚度风。有僧同杖履，更洗世情空。国朝，康熙二十八年、三十八年，圣祖仁皇帝南巡，两幸寺中，赐金刚经一部。雍正九年，总督臣李卫重修。

龙井寺 《西湖游览志》：在风篁岭。唐乾祐二年建，名报国看经院。宋熙宁中，改寿圣院，苏轼书额。绍兴三十一年，改广福院。淳熙六年，改延恩衍庆寺。咸淳《临安志》：寺有过溪亭（又名二老德威